

Bidaiarien jakinmina asetzeko txokoa izango da Tolosako Errotan

Bidaiarien Txokoa izango da aurrerantzean, Tolosako Errotan, bidaiarien jakinmin, interes etazalantzak elkartrukatzeko gune moduan. Nairobitarra Elkarateak Tolosako Udalari egindako proposamenak aurrera jarraitu du, eta atzo eguerdian aurkeztu zuten, Antxon Bandres omenduko duen proiektua.

Josu Iztuetak azaldu zuenez, esku artean duten egitasmoa herritarrei aurkezteko gogoia zuten: "Zertan ari garen jendeari azaltzeak merezi duela uste dugu". Horrela beraz, Antxon Bandresek zuen dokumentazio eta artxibo osoa eskuragarri izango da Errota eraikineko beheko solairuan aurrerantzean, bidaiarientzako txokoan.

"Materialak leku egokia behar zuela uste genuen. Izan ere, Antxon Bandresek liburu eta aldizkari asko zituen, milaka, eta nik hamahiru urte nituenean, Bandresek bere etxeko giltzak uzten zizkigun, liburuak irakurtzeko nahiz musika entzuteko. Horregatik uste dugu, bere dokumentuek eskuragarri egon behar dutela, berak hala nahi izango zukeen", nabarmendu zuen Josu Iztuetak.

Agerraldian, Ibai Iriarte alkateak prozesuaren nondik norakoak azaldu zituen: "Proposamena jaso genuenean, ideia oso xumea izan arren, oso erakargarria iruditu zitzaigun, indar handikoa". Bide horretan, udalak Errotako beheko solairua libre geratu zenean, lekua Nairobitarra Elkaratearen egitasmoarentzat uztea erabaki zuen. Iriartek, proposamena izugarri interesgarria iruditu zaiola nabarmendu zuen: "Tolosak bidaien inguruan tradizioa du, eta bada hemen, bidaiak era alternatibo batean egiteko ohitura. Kultur ondarea da hemen jasoko dena, eta esperientziak elkartrukatzeko nahiz irribarre egiteko txoko irekia izan behar du herritar guztientzat. Antxon zena omentzeko modurik onena da".

Bolondres bidaiariak

Nairobitarra Elkarteko Nagore Salaberria iruratarrak, Antxon Bandres Bidaiarien Txokoak izango duen funtzionatzeko era azaldu zuen aurkezpen ekitaldian: "Bidaia ez da lekualdatzea bakarrik: kartografia, geologia, kultura eta hizkuntza ere jorratzen dituzte bidaiek, eta gai hauek guztiak tailer, aurkezpen, ikastaro eta abarren bitartez jorratzea da gure helburua, txoko honetan".

Horretarako, bolondres sare moduko bat sortu nahi dute Nairobitarra Elkartekoek. Momentuz, iragarki arruntak erabiliko dituzte deialdia zabaltzeko, eta Interneti ere garrantzia berezia emango diote txokoaren jarduerak zabaltzerakoan.

<http://bidaiarientxokoa.wordpress.com> bloga zabaldu dute jada, eta Facebook-en ere orria egin dute; webgunea sortzea euren hurrengo pausoa izango dela nabarmendu zuen Salaberriak: "Hemengo foro fisikoa internetekoarekin paraleloan joatea nahi dugu".

Txoko berrirako diseinatu duten logotipoa ere aurkeztu zuen Nagore Salaberriak. Hainbat koloretako zatiek osatutako mundu mapa bat irudikatu dute, aniztasunarekin lotze aldera, eta kolore alaiak erabiltzen saiatu dira. Halaber, Antxon Bandresen izena letra xehez idatzi dute kartelean, "berak hala idazten zuela badakigulako".

Antxon Bandres Bidaiarien Txokoa, Tolosako Udal Liburutegiaren osagarri modukoa ere izan daitekeela azaldu zuen Susana Larrek, liburutegiko arduradunak: "Helduen liburutegian ezin da gai bakoitzean hainbeste sakondu, eta hau perfektua da horri dagokionez. Gainera, kultur jardueretan sakontzeko-eta espazio egokia izan daiteke Errota liburutegiarentzat ere. Gainera, ezagutza hau jendearen esku jartzeko oso modu interesgarria da".

Aurkezpenaren amaieran Josu Iztuetak nabarmendu zuenez, liburuak kokatzeko lanetan ari dira orain. Horrekin amaitzean, katalogatu egin beharko dute material guztia, eta liburutegiko arduradunen laguntza beharko dute horretarako. Honen harira, edozein herritarrek liburuak nahiz bidaiekin loturiko edozein gauza errotan utzi nahiko balu, ateak zabalik izango dituela azpimarratu zuen.

Antxon Bandres Bidaiarien Txokoaren irekiera "mailaz-mailakoa" izango dela azpimarratu zuten arduradunek, eta autofinantziazeko eta autogestionatzeko bideak hartuz, herritarrei antolatuko dituzten jardueren berri pixkanaka emango dietela ere bai.